

Kie-Holz

Alles Holz, vielleicht mit Ausnahme von Äche, duftet. Debei hot jedes Holz sein eichene, besondere Duft. Mir hebbe blous an emme Scheidle schmacke gmößt un scho hebbe mer gwößt, was des vor e Holz war. Do war der kräftiche, scharke, e bisle sauere Gschmack von ere Buche, des harziche, betörende Aroma von ere Tanne und es gröüschte des war Kie-Holz. Wenn mer dodro gschneubert hot, dann war des sou, als döte alli Gschmacksnerve zu tanze ofange.

Wenn noch em Holzschlaache die Baamschtümpf langsam vermodert sen, dann is bei de Tanne en Kern zurückgebliebe, in dem sich es ganze Harz ogschpeichert hot un des war de beschte Kie. Mit Tanne meene die Schnäbbärcher übrichens die Kiefern oder Forche. Es Kie-

Holz hebbe mir zum Fäüermache gnumme. Den Kie hebbe mer selbscht im Wall gholt.

Mir hebbe scho bald e Kieworzel von ere Buche- odder Ächeworzel unnerscheide gekönnt. Blous bei Lärche, do wars manchsmols net uff Ohieb klar. Äbber dann hebbe mir mit unserm Beile en Ohieb an de Wurzel gmaacht, korz an dem abgeschlaachene Holzschplitter gschmackt un scho war alles klar.

Die Kieworzel hebbe mir ausgegrabe un mit emme Schubkarre hemmgfahrn. Manche von denne Wurzel hot mer mit de blouse Henn rauszieche gekönnt. Bei anneri hot mer scho die Raithaue gebraucht un ganz grummi Deifel is mer blous mit emme Hejbel beikumme.

Sou 10 bis 15 Wurzel hebbe de ganze Winter über glangt. Die Wurzel sen gschpalte worn bis zu bleischtiftgrouße Schpreiseli. Wenn mer die Kie-Schpreiseli ausenannergebroche hot und an die Fäscherli von dere Bruchschstelle e Schtreichhölzle noghobe hot, dann hot der Kie sofort zu brenne ogfange. Do hots blous sou gezischt, gegnischtet un gebrazzelt un die ganz Küche hot noch Kie gschmackt.

Wie mer letschte Wuche im Garde bei meim Schwocher gegrillt hebbe, do hot der fors Fäüermache e Päckle „Grillanzünder“ do hergebroot. Des warn fabrikmäßig verpackti Schträfe, die a sofort noch em Ozünde gebrennt hebbe. Uff den einmaliche, aromatische, harziche un herrliche Duft, der wu sich früher beim Obrenne von Kie ausgebrädet hot, hoscht bei denne Dinger allerdings ümesunscht gwartet.



Büchlein auf mir singe eens von Josef Knapp